

并莊小蘭亭徵文錄

甲子莫春余構小蘭亭於補山園之左既同社侶三修
契事復徧乞澣內外椽筆爲斯亭增色是夏頽軀不適
就醫扶桑旋爲靜攝計西渡瑞士承國中宗工先後貽
我鴻文而病中心志疲薺雖有希世之寶僅什襲珍藏
未敢輕出而欣賞之也今春宿恙告平始發篋諷誦覺
小園風物如在眉睫間四載客居抑塞之况蕩滌無餘
吁諸君子厚我勝錫百朋矣謹錄三十篇郵付剗劂以
貽同好來春歸國當置酒斯亭重作永和勝會斯時也
諸君子儻亦惠然肯來而爲我浮一大白乎戊辰春日
菽莊主人林爾嘉識於瑞士國阿羅沙之寓齋

[illegible]

菽莊小蘭亭徵文錄

甲子三月菽莊小蘭亭三修禊序 朱家駒

甲子三月菽莊主人召客修禊於家園之小蘭亭逢三而會會三而禊畢盛舉亦創舉也是亭也經始於癸丑意誠有慕乎會稽山陰之蘭亭而補山之勝藏海之寬宜有過之無不及也余嘗神遊目想於補山之圖中凡蘭亭之所謂崇山峻嶺茂林修竹者既無不具之矣而羣賢少長之倫觴詠暢敘之樂則月中初會之二十一人再會之二十五人三會之二十八人其人文之蔚秀詩篇之流美視右軍時之四十二人同不同未可知也

至於天朗氣清惠風和暢則今之三月無異古之三月也良辰美景宜非主人之所專獨主人修禊之會月舉再三又豈徒愛惜光景及時行樂云爾哉蓋思禊事之舉所以祓除不祥也今之世界至爲不祥矣佳兵者紛紛充滿宇宙之大戕賊品類之盛仰觀俯察蒿日焉耳矣後之視今今之視昔與東晉時同不同又未可知也主人心焉憫之而無如之何不得已而託於家園之禊事殆有意祓除之而至於再至於三乎其祓之而不祥遠焉天心之將悔禍也其祓之而不祥如故焉人心之未厭亂也吾於主人遠在三千里外未獲與於斯會取

羣賢之詩而讀之然知必皆憂國之英傷時之彥拔劍斫地悲歌慷慨之所爲作也嗚呼噫嘻誠如右軍序中所云興感之由若合一契也乎臨文嗟悼不能喻之於懷右軍固先我言之矣是爲序

陳鉅前

昔周公旣成洛邑因流水以泛酒故逸詩有羽觴隨波之句後代祓禊卽沿於此司馬晉始都洛陽洛陽洛水之陽故其時之修禊者咸在洛濱後遷建業建業筦吳越之樞會稽隸焉會稽有蘭亭山水佳處每歲值上巳中朝士夫下及貴游子弟多於此張飲爲樂然皆不傳

傳者獨王右軍非以其文之不朽乎叔臧侍郎家居擅池館之勝因慕右軍之風流築亭曰小蘭亭落成之月適值禊辰大集名流歌咏其事吾意座賓當有援昔張老賀趙文子成室之文而略更其詞曰觴於斯咏於斯集少長於斯爲主人壽者惟未知是日所行觴政亦如右軍當日不能詩者罰飲三斗否令節旣過乃侍郎則有感於蘭亭序俯仰陳迹之言復於月之十三日再修禊月之二十三日三修禊興會淋漓創古人所未有顧吾考唐書文宗時已有以十三日爲展上巳又考宋書謂魏以下上巳但用三日不復用巳是三修禊亦有所

本侍郎博雅於此見一班且吾閱世說有以石崇金谷園序方蘭亭序右軍甚有欣色蓋人但知崇爲豪士而不知崇固名士崇所與遊者潘安仁陸氏機雲兄弟今侍郎所與唱和者皆一時才俊是侍郎於崇固不多讓卽以三修楔序方蘭亭序亦何不可抑吾更有言焉侍郎曾受遜朝職銜後雖易籍而故國數千年歲時遺俗恆惓惓不忘觀於前後徵吟如七夕四咏潤七夕回文三九雅集及此次命題樂操土音蓋不忘本也惟前此但徵佳作不兼及書茲兼註意書法殆以右軍楔帖以文傳亦以書傳晉書載右軍此帖用蠶繭紙鼠鬚筆書

凡二十八行三百二十四字故侍郎此次徵文亦特頒
紙格乎鄙人不揣竊欲附驥特恐文旣類疥駝書亦譬
野鷺有瀆玄覽然終不能自閔者則以吾閩東門外有
桑溪溪流玉折風景不減蘭亭昔閩王延曦修楔於此
石刻猶存侍郎他日倘遊閩挈俊侶修故事於桑溪鄙
人倘得因是作而獲與楔飲之末是所厚望爰序並書

邱中基

蓋聞羽觴隨波逸詩記東洛之盛金人捧劍霸圖北西
時之祥他如武皇飲公主之家文宗賜侍臣之宴武林
社鬧百戲具陳昭慶寺崇十方隨喜重三令節佳話爲

多要不若山陰一集長留繭紙英靈座上羣賢半屬烏
衣逸彥此寶晉齋所以流馨悅生堂特爲印可也菽莊
侍郎僑居鷺島天授鶴姿逍遙契南華之旨瀟灑慕東
晉之賢風雅主持不數月泉社長江湖流寓合稱烟波
釣徒憶荆楚之歲時借題托興援洛陽之風土踵事增
華時則菽莊之小蘭亭適成意匠經營額題揭櫁頗得
鷗波之趣不襲龍泉之名放鶴此間共識逋僊遺裔流
觴是日允爲內史替人於是散桃花之牋滌竹葉之甕
節過寒食可尋參寥子茗談會匪龍華不犯太常家齋
禁溱洧渙于焉贈芍滄浪清可以濯纓浴蘭和楚澤之

吟藉草仿新亭之宴座無鵬鳥主人可釋憂顏鼎有熊
蹯賓從相誇食指曳白依舊章罰飲踏青覓前伴出遊
祖典不忘國香共佩固已舉不祥而盡袂且勿問爲歡
之幾何而乃折柬更番飛蓋絡繹三毛飯設三雅酒陳
郝參軍蠻語翻新裴逸民清談許續佳章擊節一唱三
嘆有餘音急鼓催花再衰三竭可勿慮廣曲江三日之
宴爲平原十日之歡黍麴三與嘗新油花三符卜吉三
生白石上寫成行樂之圖三疊紫雲回合與列僊共咏
九十日韶光欲滿婪尾尤佳廿四番風信頻催紅顏未
老餘興固知不淺數見誰謂不鮮一咏一觴鎮與古懽

相接三薰三沐更何宿垢之留回憶廈津兵火戰艦連
檣惡氛非桃茆能祛清興爲蘆笳所敗以致新題閣置
隔歲始頒取嘲明日黃花盼斷好音青鳥茲者薺花綻
綠柳帶縈青家山無風鶴之驚里社復雲龍之會吉祥
止止花草精神裙屐翩翩林泉潤色三宿下南州之榻
三巡傾北海之樽恐鷓鴣之先鳴會辜鬥草拚葡萄之
共醉候應秉蘭勝會獲從羨餘姚前令嘉招不及愧老
符秀才定知三日皆晴天公做美長此一亭不朽地志
增光風浴有懷願附孔門言志之列日新共勉竊援湯
盤進德之銘

陳謙撝

夫棗浮絳水瞻帷幔之飛揚蘭秉洧濱覩裙釵之雜沓
是以時逢元巳世人競效潔清節居上除風尙相沿被
濯修禊之事由來舊矣爰有鷺島寓公孤山世冑混居
塵世早滌煩襟黃叔度千頃汪波獨具高人雅量杜少
陵萬間廣廈盡教寒士歡顏闢補山藏海之園收太武
日光之勝逍遙世外署隱所曰菽莊領略箇中構小亭
於蘆溆更拓一邱淨土適當三月暮春旣土木之告成
翼然特出雖丹塗之未設卓爾大觀維時宿雨方收鳴
禽互答榆錢圓而送暖柳絮舞而弄晴恍憶前游仿泛

舟於赤壁還尋新約踵修禊於會稽於是走東傳箋獻
儔命侶安排酒棗洗滌茶鐺作援蘿結桂之思重招舊
雨聯緩帶振襟之雅同挹春風一咏一觴幸歡條之未
損濯纓濯足隨物遇之自然其人如霽月光風澄不清
而渚不濁此地有茂林修竹俯可察而仰可觀作倉卒
主人佳辰何分今昔開風騷別調險韻競鬪尖義行樂
及時良有以也爲歡未已可無繼乎維東道達觀早料
盛筵易散而南樓清興還期後會重修緣本三生韶華
總須暫駐月凡三集童冠儘可與偕酒罰三升先期預
令徑延三益指日頻開社人共惜三春座客幾增三倍

但見香車寶馬謝庭之子弟爭來帽影鞭絲白傅之池
臺殆滿工對儘多束皙善談不乏張華主不俗則賓盡
歡曲彌高而和非寡人謂灞上洛中之禊無其雅金堤
石壇之禊無其長也然而竹林昨游或多問訊蘭亭後
感不盡牽縈具茲澄抱淵衷恨不廣交四海願以騷人
墨客傳來韻事千秋新而又新共徹湯盤之旨樂能同
樂如聞點瑟之聲起應騷盟音毋遐乎金玉集成禊帖
裝特美以潢池定知賦就甘泉才多吐鳳經書道德字
可換鵝惟是王寧朔作序芳林園文終拘乎應制顏特
進賦詩樂游苑意總涉於貢諛泉石風流紀事但求翔

實詠歌清曠。摛詞無取。掞張僕也。筆乏生花。緣慳躋柳。
怦然見獵。率爾效顰。忘異地。關河竊附。澡心浴德。相昔
年裙屐如親。洗髓伐毛。醉心儀北海之尊。世復見孔融
好客。學步序南昌之閣。我豈如王勃能文。

江 桐

百代江山。曾經劫火。別家庭院。一半莽榛。卽景生情。雲
物之變遷。不少撫。今思昔。登臨之感慨。何如漁仲荒園。
無邊蔓草。君莫廢。第一片殘陽。海燕歸巢。未定覓誰家。
之壘。越禽向暖。不知棲何樹之枝。漫誇都尉園中珊瑚。
七尺誰羨。小侯室內。翡翠千重。此不禁慷慨懷人而惋。

傷弔古也。迺有廈島鼓浪嶼者。徐福神山。安期蓬島。雲山迢遞。佇看天外之槎樓閣。參差幻出海中之市波濤。拍岸一條。煩襟竹木成林。時聞清籟。略似裴公綠野儼然。李氏平泉。遠瞻鹿耳山環。螺髻一帶。靜聽鷺門潮湧。鴨漲三篙。是蓋囊括宇宙之精英。籠絡山川之名勝。已菽莊依山結宅。導水爲園。屈曲唯九折。羊腸盤坳。若三危鳥道。閘局止水。園傍補山。繚蘆淞以前橫。激花溝而右轉。聽潮樓下。籟發茂林。藏海園南。風搖修竹。鶴汀鳧渚。秀極人間。花塢月潭。甲於天下。雖當年梓澤無此名區。春夜桃園。遜茲佳景也。於是度地作亭於補山園之